

Co la comunanza, vardan al davegnir

Te la setemèna del azet, che chest an aea per titol T-Essere Comunità, i Servijes sozio-assistenziei del Comun General à metù a jir scontrèdes e ativitèdes per smaorèr i leames e l benstèr de la comunanza



La scontrèda col dr Francesco Brunori.



I balarins de «Tango al buio» con Mirella Florian e Cipriana Tomaselli.



Coordenadores e maestres de Scolines e Coa, con la referentes di Servijes sozio-assistenziei del CGF.

Creèr na rei te la comunanza che posse vardèr e pissèr al davegnir che se volessa per noscia val, per meter ju programes e prospetives e envièr via vèlch scomenzadiva concreta, l é n obietif che l Comun General de Fascia, con si Servijes sozio-assistenziei e la conseiera de procura Mirella Florian porta dant da n bon trat de temp. Apontin per chest, defat, la Conseiera aea metù a jir l percors partezipatif che à portà a meter ju l Pian Sozièl de Comunità e la ge aea metù inom 'Anteveder'.

Dut chest la medema Mirella Florian la l à recordà en jebia ai 3 de otober, canche te la senta del azet, l é stat envià l dr Francesco Brunori de la sociazion Skopia Anticipation Service, che se cruzia apontin de studies de antizipazion sul davegnir. L argoment de la setemèna del azet 2024 del CNCA, 'T-Essere Comunità' passenèa defat patoch col percors envià via con 'Anteveder', e l dr Brunori, che à na formazion belebon ecletica che tol ite aspec che va dal ciamp aziendèl a chel sozièl e educatif, l é stat chiamà per didèr la comunanza a 'fèr teila' vardan al davegnir.

»Sion usé a vardèr semper al prejent – l à dit Brunori – ma l é besegn de scomenzèr a vardèr al davegnir, e chest no l pel vegnir fat da ogneun a na vida individuala, ma ge vel che a l fèr sie na comunanza entria. Demò da la mediazion anter la vijions desferentes – à dit amò l relator – pel vegnir fora la 'intelligenza coletiva' che pel pissèr a scenaries che podaron se troèr dedant. No podon saer che che sozedarà, e chierir soluzions 'do', magari l é massa tèrt e fazile comportarà n cost maor, per chest cognon vardèr de se fegurèr duc i scenaries possiboi, cognon jir fora da la 'comfort zone' del »aon semper fat cosci« o dal sentiment de renunzia del »tant no joa a nia«. La realtà de anchecondi, col mond che va semper più coran e se stenta a ge stèr do – l à dit amò Brunori – ne domana de esser enjigné a

responder a evenc neves e no pervedui, a chierir soluzions desferentes senza vardèr al passà e senza aer tema de falèr; falèr l é l investment maor per emparèr.

Per fèr 'ejercizies de davegnir' tel cors de la scontrèda l é stat metù adum n grop de interlocutores che se binarà te vèlch scontrèda te chisc meisc per se confrontèr su co che se pel ge fèr front al davegnir. L zil – à sottrissà Brunori – no l é tant chel de troèr fora 'che' fèr, ma de se arcedèr a pissèr a 'co' fèr per troèr fora respostes, con fantasia e creatività. La restituzion del lurier de chest grop é perveduda amò dant che sie fora chest an 2024.

Teater, bal e confront educatif

Te la setemèna del azet te Fascia l é stat metù dant na lingia de etres evenc: dal teater coi Bontemponi e con la Filodrammatica de Lavis e la Sociazion Fiemme Fassa Sport Inclusivo per 'esser' comunanza ence ti momenc de spas e legreza, a la festa per i giaves col confront anter generazions, a la proponeta de bal terapeutich. En cont de chest, en vender ai 4 de otober te teater del oratorie de Poza l é ruà da Trent n grop de balarines e balarins de la sociazion »Tango al buio« con la maestra de bal Simona Niero.

Chest inom – à dit la insegnanta de bal – l é nasciù canche me é stat domanà de fèr lezioni de tango a persones che no veit, dapò è abù l met de me confrontèr ence con de altra sorts de desabilità, ence per la paralimpiades, e la sociazion ades é cognosciuda a nivel internazionèl.

L publich à podù veder la esibizion sun paladina de na cobia con n balarin che no veit, ma a soscedèr l'emozion maora l é stat la coreografia de Simona Niero con na beza de 9 egn, Noemi, che no la é bona de stèr en pe da soula, ma che l'ha moscià duta sia braura ti movimenc del bal.

La referenta di Servijes sozio-assistenziei Cipriana Tomaselli e la conseiera Florian à rejonà de l'empor-

taanza de tor ite la comunanza con scomenzadives e proponetes desferentes, anter chestes l é stat pissà apontin ence al bal. L é stat desmostrà – les à dit – che l tango l é de gran aiut tant per contrastèr l smendrament cognitif e altra malaties degeneratives che per creèr ocajions per fèr comunanza. Per chest, en colaborazion con Spazio Argento, tel chèder del Pian de Trei egn per l svilup de na Comunanza Amica de la persones con demenza l é stat endrezà 3 cors de tango con Simona Niero, un rresservà ai utenc del Zenter de encounter, un per chi che à più che 65 egn e un per duc. I enteressè cogn se oujer ai Servijes sozio-assistenziei del CGF (tel 0462.764297) dant dai 15 de otober.

Adum anter scolines e coa di picioi

En ultima, semper per T-Esser comunanza, l é stat prejentà la scomenzadiva de colaborazion e confront metuda a jir anter la Scolines de Fascia, tant provinzièles che equiparèdes, e la Coa di picioi de Soraga.

Elisa Bonapace, coordinadora pedagogica de 'La Coccinella' che gestesc la Coa di picioi, à palesà sia sodesfazion per coche va inant chest nef servije tant spetà te Fascia, che l é apontin l prum vèrech del 'Esser comunanza', e l'ha dit che l é stat envià via na bela cordanza con la coordinadores de la scolines. A jir ite tel detai de chesta cordanza l é stat dapò la coordinadora de la Scolines, Sara De Zolt per la equiparèdes e Tatiana Soraperra per la provinzièles.

»L prum vèrech – à dit De Zolt – l é vardèr de creèr ocajions de confront per se cognoscer miec e entener chel che ne met adum e chel che ne desferenzia« »L obietif – à jontà ite Soraperra – l é de jir inant con la creazion de n grop de lurier con la insegnantes de chisc desvalives livie per creèr na continuità educativa che mete semper al zenter l bez.«

Lucia Gross